

E directiva diaro a señala den Corte

Gobierno a usa argumento fofu pa nenga ASOMA permiso pa organiza CASOCA

ORANJESTAD(AAN) — Ayer mainta Corte den Promer Instancia den caso LAR a trata e caso cu ASOMA a cuminsa contra Minister Presidente. Miembronan di e directiva diario di ASOMA esta sr. Rasmijn, sr. Juddan y sr. Marten a representa ASOMA den Corte mientras cu abogado nan mr. Ecury, mr. Gravenstijn y mr. Faouzi a representa Minister Presidente.

Door cu e caso aki tin hopi interes den pueblo, DIARIO a dicidi di publica e punto di bista di cada partido separa pa asina nos lectornan por evalua tur cos y saca nan conclusion. Den e articulo aki, DIARIO ta publica e punto di bista di ASOMA caminda a hiba palabra sr. Marten, sr. Rasmijn y sr. Juddan.

CONVENIO CU SAC PA ORGANIZA CASOCA

Sr. Marten a bisa Juez mr. Angela cu e motibo cu a cuminsa e caso ta pasobra ASOMA no ta di acuerdo cu e argumentonan cu Alto Comisario di Polis, Nectar, a

usa den su carta pa nenga ASOMA e permiso pa organiza e festival CASOCA na San Nicolas. Marten a señala cu di parti di warda di polis San Nicolas, caminda a hiba e peticion promer, no tabatin ningun obhecion contra esaki. Sin embargo na Oranjestad, Nectar ta pone cu esaki ta violacion di e maneho cu tin cu SAC y cu e evento lo trece problema cu interes general y orden publico.

Marten a señala cu gobierno a duna SAC e poder pa organiza carnaval pero no tin ningun ley ariba esaki. Segun Marten, SAC ta e organo cu ta encarga cu coordina eventonan carnavalesco pa evita cu esaki lo bira un caos.

El a sigui bisa cu CASOCA no ta un evento pa reemplaza Calypso y Roadmarch Contest sino un evento cu e meta pa ASOMA crea fundonnan necesario pa cubri su gastonan y tambe paga e musiconan, loka ta toca na nan. Marten y Rasmijn a bisa Juez cu tin un convenio di 1998 cu

SAC caminda ASOMA tin e autorizacion pa organiza un evento banda di Calypso y Roadmarch Contest. Rasmijn a bisa Juez cu na 1995 ASOMA a yega di organiza CASOCA, mientras cu mas o menos 2 aña pasa ASOMA lo a organiza "band of the bands".

SAC NO TIN MONOPOLIO

ASOMA a muestra Juez cu no ta asina, manera lo ta pretende, cu CASOCA lo reemplaza Calypso and Roadmarch Contest. Sr. Marten a muestra cu segun e statuut di ASOMA, ASOMA tin e libertad di organiza evento musical caminda e miembronan di ASOMA ta participa na esaki. Ta hustamente esaki ASOMA kier haci cu CASOCA. El a muestra cu for di 1986 gobierno tin palabracion cu SAC pa coordina eventonan di carnaval. Segun statuut di SAC, SAC ta un organo pa coordina eventonan di carnaval y no ta asina cu ta SAC ta dicidi si evento

por tuma lugar.

Pa loka ta trata e evento di CASOCA cu ASOMA kier a tene 15 di Februari, segun ASOMA, SAC tabata sa di esaki pero a schuif e lighting-parade di San Nicolas net riba e 15 di Februari cu ASOMA kier a organiza CASOCA.

ASOMA SEMPER A YUDA SAC

Marten a bisa Juez cu ta ASOMA ta esun cu ta organiza Tumba Festival, Calypso y Roadmarch Contest pa SAC. E unico cos cu SAC ta haci ta cobra na entrada. Nunca ASOMA a haya ni un cent for di SAC pa esaki. E placa cu ASOMA ta haya ta e placa cu ta coresponde na e gruponan musical, compositor, areglistanan cu a participa na e contestnan.

ASOMA KIER TENE CASOCA

Marten a bisa Juez cu ASOMA kier tene CASOCA, no riba 15 di Februari pero riba un otro fecha. Juddan a señala, con por ta posible cu companianan si ta haya permiso por organiza diferente evento cu aprobacion di SAC y avor ASOMA cu ta representa e musiconan Arubano

no por haya permiso.

DIRECTIVA DI ASOMA TA LEGAL

A base di ponencia di abogado nan di gobierno, cu e directiva actual di ASOMA ta ilegal, sr. Rasmijn cu ta e presidente actual a duna Juez un splicacion amplio kico a pasa cu mester a haci cambianan den e directiva y cu segun articulo 21 di statuut ta duna e directiva e derecho pa haci tal. Rasmijn a conclui cu e directiva actual di ASOMA ta legal y ta un comision nombra door di e directiva aki, a negocia cu SAC caminda dia 30 di Januari 2003 a yega na un convenio pa organiza Calypso y Roadmarch Contest.

Juez mr. Angela despues di a scucha e otro partido a expresa cu e ta lamenta cu den temporada di carnaval tin problema asina. El a propone pa e dos partidaron sinta na mesa y yega na un areglo riba CASOCA. El a instrui abogado di gobierno pa mayan, esta diaranzon, laga Juez sa si SAC ta dispuesto pa sinta na mesa cu ASOMA. Si esaki no ta asina of si e reunion no resulta, e ora ey Juez lo dicta sentencia.